

САМУРДИН

ССС

«Магъарамдхуьруьн район» МР-дин
общественно-политический газет.
Общественно-политическая газета
МР «Магъарамкентский район».

ГОЛОС САМУРА

Газет 1951- йисалай акъатзава. № 36 (8071) киш, 4- сентябрь, 2021- йис. Къимет 6 манат

ТЕБРИК

«Магъарамдхуьруьн район» МР-дин Администрациядин патай за райондин вири малимриз ва школайра келзавайбуруз Чирвилерин югъ рикин сидкьидай тебрикзава.

Акълтзавай несилдиз дерин чирвилер ва мягкем тербия гунин карда чи малимри и яргъал йисара квалахда девлетлу тежриба кватнава. За инанмишвал ийизва хьи, чи малимри и тежриба гележегдин квалахдани гегъеншдиз ишлемишда.

Райондин Администрацияди школайра къулай шартлар яратмишунин ва малимрин яшайишдин шартлар хъсанарунин рекъай гележегдани еке къайгъударвал ийида.

За квез Чирвилерин югъ и члехи сувар мад са сеферда мубаракзава.

Ф.З. АГЪМЕДОВ,

«Магъарамдхуьруьн район» МР-дин Администрациядин къил.




1- СЕНТЯБРДИЗ дагъдин ценеривай башла-
мишна Каспий гъуьле акъадалди райондин вири
школайри чпин раklarар ачухна- им келдай цийи
йис башламишунин лишан хъана.

Чирвилерин юкъуз райондин вири школайра
шадвилини линейкаяр тешкилувилелди къиле

фена. Сифтегъан зенгини ван авуна. Ада аялриз шко-
лайрин раklarар ачух тирди ва чеб къабулиз гъазур тир-
ди хабар авуна.

Къуй абуру чирвилерин алемдиз вегъезвай камар
мягкембур, дурумлубур, чирвилерин куклушрал къван
фидайбур хъурай.

МАЛИМРИН АВГУСТДИН СОВЕЩАНИЕ



27- АВГУСТДИЗ, райадминистрацияда «Магъарамдхуьруьн район» МР- дин кыл Фарид Агъмедован регъбервилик кваз, малимрин августдин совещание кыле фена. Совещаниеде акъалтлай келунин йисан нетижаяр кьунин, 2021-2022-келунин йисаз гъазурвал акунин, къазанмишнавай агалкьунрин, вилик кумай гъялна кланзавай месэлайриз килигна.

Гъакни совещаниедин квалахда республикадин образованиедин центрдин директор, «Дагъустан республикадин педагогрин ассоциациядин начальник Анжела Байрамбековад, «Гъахъ тир Россия» ва «Сад тир Россия» партиярай РД- дин Халкъдин Собраниедин депутатвилиз кандидатар Мусафенди Велимурадовани Ильман Алипулатова иштиракна.

Райондин Къили, образованиедин хиле зегъмет члугвазвай активдиз алукузайвай цийи келунин йис тебрикна.

-Малим вири вахтара граждандивилин ва ватанпересвили чешме я. Иниз килигна, вирида-



лайни важиблу кар- акъалтзавай несил тербияламишун, обществоди малимдал ихтибарнава. Малум тирвал, уьлкведин, республикадин, райондин гележег малимдин квалахдила аслу я. Федеральний ва республикадин проектрин сергъятра аваз са къадар квалахар тамамарнава. Къенин юкъуз чи вилик, алай аямдихъ галаз къазвай еридин

образование гун паталди келунрин ва материалринни техникадин база хъсанарунин месэла акъвазнава. Райондин вири школайра планламишнавай ремонтрин квалахар тухванва. Месела, образованиедин са бязи дараматар куьгъне хъуни, авай материалринни техникадин базаяр зайиф хъуни

МАЛИМРИН АВГУСТДИН СОВЕЩАНИЕ



3 ←

секинсузвал кутазва. Образование вилик ту-хузвай Федеральний программадай чара авунвай такъатрихъ 1960 ва 1980 – йисара эцигнавай 24 дараматда асул дибдай ремонтар авун пландик кутунва. Ремонтрин ківалахар 2022- йисалай 2026- йисалди тухун планламишнава. 2022- йисуз Магъарамдхуърун 1-нумрадин, Гилийрин ва Филерин хуърерин школайра асул дибдай ремонт авунин заявкаяр ганва. Къепиркъазмайрин, Тагъиркъазмайрин, Азадогълидин, Кчункъазмайрин, Муъгъверганрин хуърера школаяр ва Къепиркъазмайринни Муъгъверганрин хуърера аялрин бахчаяр эцигунин заявкаяр ганва,- лагъана Фарид Загъидиновича.

Гуъгъуънлай, райондин Къили, кыле фейи ВПР- рин (вирироссиядин ахтармишунрин ківалахар), ЕГЭ- рин нетижаяр къуна ва образованиедин идарайрин руководителриз и жигъетдай тухузвай ківалах гужлу авуниз эвер гана.

Совещаниедал рахай Анжела Байрамбековади школайра сифте нубатда тербиядин ківалах къайдадик кутуникай ва педагогрин вилик акъвазнавай месэлайрикай рахана. МР-дин образованиедин управлениедин начальник Улубег Абейдуллаев, аттестацийрин, олимпиадайрин ва кыле фейи гъар жуъре конкурсрин нетижайрикай гегъеншдиз рахана.

Эхирдай Фарид Загъидиновича яргал йисара гъакъисагъвилелди зегъмет члугвазвай, муниципальный, республикадин ва вирироссиядин дережайра агалкъунар къазанмишнавай малимрив наградаяр шад гълара вахкана.

А.АЙДЕМИРОВА .



ЦИЙИ КТАБ

«ГЪЕПЦЕГЪ –НАМЕ»

И ЙИКЪАРА «Мавел» чапханади клелзавайбурув цийи ктаб «Гъепцегъ-наме» агакърнава. Им хуьруьн тарихдиз талукърнавай сад лагъай ахтармишун я. И важиблу кваллахдин себебкарар - гъепцегъви, биологиядин илимрин кандидат, РД-дин лайихлу малим, РФ-дин АПО-дин член-корреспондент, РФ-дин килин пешекарвили образованиедин Гъурметлу работник МУКАИЛОВ Мукаил Изберович ва гъакъван вичихъ къакъан дережаяр авай илимрин доктор, профессор, писатель, общественно-политический деятель Къурбан Халикович АКИМОВ я.

Цийи ктаб арадал атун патал твар-ван авай алим-археолог, тарихдин илимрин доктор, профессор Амри Ризаевич ШИХСАИДОВАНИ вичин вахтунда хейлин кумекар гана. Ада вичихъ галаз хъайи гуьруьшрин вахтунда Мукаил Изберовичаз лугъудай: «Гъепцегъ хуьруьн тарих Къиблепатан Дагъустанда виридалайни тлимил ахтармишнавайди я. Гъавилий ви кваллахди клелдайбурун патай еке итиж арадал гъида».

Алим са къадар шаклуни тир жеди. Гъикл лагъайтла, хуьруьн тарихдай, вични садрани ахтармиш тавунвай, члехи ктаб кхьин гекъигун авачир хътин еке зегъмет ва жавабдарвал я. И кар гъиссзавай профессор Амри Ризаевича алава хъувунай:

«Са жуьрединни тарих авачирдалай са гъихътин ятлани жуваз чизвай тарих хъсан я. Адал гуьгъуьннин несилри алаваяр хъийида».

Гъакъикъатдани, эгер хъсан фагъум-фикиргайитла, къенин йикъакай пакадин югъ патал тарих жеда. Гъа ик Мукаил Избе-

ровичан кваллахни башламиш хъанай.

Хайи ерийри чи риклериз датлана чим гузва. Чун цийи къуватралди руьгъламишзава ва бахтлу ийизва. Гъар садаз вичин хайи хуьр багъа я. Гъа саягъда Гъепцегъарни чаз мукъва ва клани я. Чаз гъепцегъвийриз, адан тарихдин гъар са жизвини багъа я. Чун



патал абурухъ къетлен метлеб ава.

Ихътин важиблу кваллах килиз акъудай алим Мукаил Изберовичаз чи хуьруьн гъакъиндай лап гзаф делилар хъсандиз чизвай. Гъикл хъи, ам и хуьре хана, члехи хъайи ксарикай сад я. Идалайни гъейри, ктаб кхъидалди вилик Мукаил Изберович чи хуьруьн (куьгъне ва цийи) вири мулкара, пиплера къекъвена. Гъар са черекдал вуч алатла, вуч хъанатла, дериндай ахтармишна.

Алай вахтунда цийи хуьре куьгъне Гъепцегърикай чирвилер авай инсанар лап тлимил ама. Чун инал рахазвай ктабди а хуьруьн тарих дибдай, са жизвини хкуд тавуна арадал хканва, фадлай риклелай алатнавай крарни, вакъиаярни, инсанарни

рикел хкизва. Жегъил несилриз чи члехи ва улу-бубайрин са шумуд несилрин игитвилерикай, абуру члугур зегъметдикай, абурун регъят тахъай уьмуьрдикай гзаф чирвилер агакъзава.

Хайи хуьр ва адан тарих, хуьруьн инсанар Мукаил Изберовичан ктабдин килин темаяр я. Ктабда саки V асирдилай къенин йикъарал къведалди тарихдин вакъиайрикай суьгъбетзава. Чна винидихъ лагъанвайвал, им регъят кваллах тушир. Лап гзаф материалрин арадай, делилрикай, вакъиайрикай гележегдани герек жедайбур хкъана кланзавай. Алимди абур устадивилелди хкъанава ва галай-галайвал, хронология вилив хвена, ктабда ачухарни авунва. Авторди, чаз чидайвал, и ктабдал са шумуд 10 йисуз зегъмет члугуна. Ада, винидихъни къейднавайвал, хуьруьн агъсакълрин шагъидвилерикай гъейри, хейлин архиврин материалрикай, газетризни журналриз акъатнавай макъалайрикай ва маса чешмейрикай устадивилелди менфят къачунва.

«Гъепцегъ-наме» са шумуд паюникай ва килерикай ибарат я.

Сад лагъай пай Гъепцегъ хуьруьн тарихдизни этнографиядиз талукърнава. Ана суьгъбетнавайвал, Гъепцегъар эвелдай Самур вацлун чапла патан къерехдал, тахминан 500 метрдин къакъанда, Джаркан твар алай участокдал алай. Амма Дагъустандал арабрин чапхунчийри гъужумайла, иллаки къвед лагъай сеферда атайла, мусурмандин хушуналди къабул тавур гъепцегъвийр дин къабулуниз гужуналди мажбурзавай. И кар члехи ягъун-куклунралди, къи-

ЦИЙИ КТАБ

никьралди куэтягь хъана. Гъепцеьрин куьгьне хуьр арабри чапхунчивилелди та-хъай мисал авуна. Чан ала-май гъепцеьгьвийри чпин бие-неяр Кетин дагьдин къуьнел, гъуьлелай 2200 метрдин къа-къанда кутун хъувуна. И па-юна авторди хуьруьн тIварни гьикI арадал атайди ятIа, вичин баянар ганва. Ина гьакI хуьруьн тIебиатдин девлет-рикай, адан къушарин, наба-татрин алемдикай, яйлахри-кайни никлерикай, халкъдин адетрикай, Гъепцеьрин гекъ-игун авачир хътин ятарикай, булахрикай рикIиз хуш къве-дайвал суьгьбетзава. Ихътин суьгьбетри гьар са инсан, вичин хайи ватандихъ цигел яз гьа дагьлариз хутахун мумкин я.


Ктабдин къвед лагьай пай «Гъепцеь-Советрин де-вирдин чешнелу хуьр» я. Ана ЧIехи Октябрдин инкъилаб-дилаи инихъ та 1991- йисал къведалди девирдикай суьгь-бетзава. Авторди Дагъустан Республикадин автономияди-кай, хуьруьн асайиш, яшай-иш арадал атуникай, Ватан-дин ЧIехи дяведа чи хуьруьн-вийри гьикI иштиракнатIа (дя-ведай чи хуьруьнвийрикай 110 кас элкьвена хтаначир, гьа жергедай яз Мукаилан буба Изберни) суьгьбетнава.

Авторди Гъепцеь хуьре магьсулдарвал, хипехъанвал, малдарвал, рамагбанвал, куь-нуьчивал, энергетика, культу-ра, гьилин-тупIун сеняткарви-лер гьикI вилик фенатIа, га-лай-галайвал ачухарнава.

Ктабда хейлин чинар чи кIвалерин къенепатан туькIуьр хъуниз, ишлемишза-вай къаб-къажахдиз, чи су-варризни мелериз, маса шад-вилериз бахшнава. Гзаф маса хуьрер хъиз, 1966-йисан зал-заладин нетижада чи хуьрни арандиз (дуьзендиз) куьчарна. Ана цийи ва гьакьван къу-

ватлу майишат (совхоз) ара-дал гьана. «Мукьтадирский» совхоз вири Дагъустанда машгьурбурукай сад хъана. И карни ктабда хъсандиз къалур-нава. 1991-йисуз виликдай та-кур хътин дегишвилер арадал атана. Гьа чIавуз яваш-яваш мусурманрин диндин къанун-рални чан хквез гатIунна. И девирдикайни авторди хъсан-диз суьгьбетнава.

Ктабдин пуд лагьай пай-«Социализмдилаи - капита-



лизмдал» - авторди, за къатIайвал, регьятвилелди кхьенва. ГьикI лагьайтIа, и де-вирдин вакъияяр мукьвара хъайибур ва рикелай алат тавунвайбур я. Идалайни гьей-ри, хейлин делилар чи газет-райни журналрай, интернет-дай къачуз жезвай. Авторди гзаф материалар хуьре яша-миш жезвай яшлу ксаривайни кIватIнава. Гьавилай Цийи Гъепцеьрин хуьр арадал ату-никай, ана перестройкадин дегишвилер- реформаяр киле финикай ва арадал гьайи кьилдин ксарин майишатри-кай авунвай суьгьбетар гьар сад инанмишардайбур я.

И паюна гьакI XXI ассир-да чал элкьвенвай жуьреба-жуьре тIегъуьнрикайни, обра-зованиедин идарайрикай- хуь-руьн аялрин бахчайрикай, юкь-ван школадикай ва ам

акьалтIарай ксарикай, хуьруьн алмиркай, жуьреба-жуьре хилера чпихъ къетIен агалкъ-унар хъайи инсанрикай, куль-турадин векилрикай, журнали-стрикай, спортсменрикай, жуь-реба-жуьре вакъияйра (Венгриядин, Афгъанистандин, Кеферпатан Кавказдин) ишти-ракай ксарикай рикел ала-мукьдай тегьерда суьгьбетна-ва. Кар алайди, чна къатIайвал, са затIни ва са касни рикелай алуднавач.

Тарих арадал гьизвайбур инсанар я- и фикир ктабда кьилий-кьилиз аквазва. Гьа-вилай авторди ктабда жез-май къван гзаф инсанрикай суьгьбетнава. КIелзавай кас-ди, иллаки къвезмай несил-ри, чпин хуьруьн алатнавай девирдин векилрал дамах-да. Идалайни алава, кIелзавайдаз адетдин инсан-ри хуьр хуьн патал гьикьван викIегь крар авунатIа, гьа са чIавуз чпихъ руьгь, рикI ава-чир са бязи чиновникри хуьр гьикI маса ганатIа чир жез-ва.

Эхирдай мадни алава хъийиз кIанзава: ктабдиз сиф-те гаф кхьенвай машгьур алим, писатель Къурбан Хали-кьович Акимова автордин гьакьиндай лагьанва: «Гъеп-цеь-наме» ктабдалди авторди къве памятник арадал гьан-ва: сад-вичин халкъдиз, къвед лагьайди-вичиз».

Ихътин кьимет гунихъ га-лаз рази тежедай себеб авач. Чна гьам автордиз, гьамни вири гъепцеьгьвийриз ктаб-цийи памятник мубаракзава. КIела, гьуьрметлубур! Куьн руьгьдалдини, чирвилералди-ни къуватлу ва девлетлу жеда.

Н. МЕГЪАМЕДРАСУЛОВА,

Магьарамдхъуьруьн район-дин Гъепцеьрин юкьван шко-ладин урус чIаланни литерату-радин малим.

ИЛГЪАМ

Гъажи ЖЕЛИЛАН
дафтардай

ЛЕЗГИЯР Я ЧУН

Къилел живедин бармак алай дагъ
Ам лезги дагъ я.
Кеспидик кватла къилел алаз рагъ.
Лезгияр сагъ я.
Тлурфандин кланик суьруь хуьдайбур
Чун- лезгияр я.
Чилел яр-емиш, ризкъи гъидайбур
Чун- лезгияр я.
Къвале мугъмандиз чка гудайбур
Чун- лезгияр я.
Гъар са магърумдихъ жигер кудайбур
Чун- лезгияр я.
Ватан хуьн патал цлаюз фидайбур
Чун- лезгияр я.
Гъич дарвал тагуз аскер хуьдайбур
Чун - лезгияр я.
Дуьньяда авач са чиб алай чил
Лезгияр авачир.
Аквадач анрай гъерекатдин къил
Лезги галачир.
Ингъе Заратистр, Муграгъа хайи,
Албан-лезги я.
Дегъ заманайриз цийи дин гайи
Жуван-лезги я.
Къураматдани, гъак1 гъуьлерани
Герек лезгияр.
Манийрални, гъак1, туьнт къуьлерални
Зирек лезгияр.
Къеве гъатайла кака пайдайбур
Чун- лезгияр я.
Захавал къуртла, межлис гурдайбур
Чун- лезгияр я.
Эхъ, лезгияр я къадим вахтарлай
Дуьз тарих авай,
Серт женгерайни физ хъана чавай,
Чилляйни, цавай.
Муьгъуьббатдикай Межнунавайни
Лугъуз хъайид туш
Чавай хъиз мани, я гафаралди
Тухуз хъайид туш.
Чун Шарвилидин, Гъажи Давудан
Миллетдикай я,
Алейгъисалам чи пайгъамбардин
Уьмметдикай я.
Ислягъ халкъ я чун, ша къан гъил-гъиле
Кам вилик къачун.
Бесрай хъайиди сад-садан хъиле,
Лезгияр жен чун.

Квез чидани?

*Мегъуьн тарцин, вак1ан к1ирийрин (облепиха), японский са-форадин чкалри бедендик квай ше-кердин къадар къайдадик кутада. Цикорийдин ва репейникдин (къа-къар) дувулри ч1арар, сарар, ки-кер мягъкемарда, вилерин экв хъса-нарда. Абурук табагъдин шейэр А, Е, С, В, В-2, В-6, В-9 витаминар. Омега -3, Омега-6, Омега -9 кис-лотаяр ва кремний гъаф ква.

*Вак1ан к1ирийрин (облепиха) чкалри иммунитет хкажда, рик1ин к1валах хъсанарда, бедендик иви т1имил хъанвайла, ам къайдадиз хкиз, иринламиш хъанвай (язва) хирер, остеопороз азарар сагъа-риз куьмек гуда.

* Хъархъу тарцин таза хилерин чкалрихъ беденда авай йоддин къа-дар ва нефесдин органар къайда-дик кутадай, гъак1ни беденда авай жуьреба-жуьре паразитар (шарар ва мсб.) рекъидай ва щитовидный же-лезадин азарар сагъардай къуват ава.

*Ч1уру шабалатрин таран чкалри рик1ин азарар, тромбофлебитар, фалуждин, варикоздин азарар сагъ-ариз ва бедендик квай холестерин т1имилариз куьмек гуда.

*Ц1велин тарцин чкалар куьлуь тварар акъатна, дак1уна яру хъан-вай (восполительные) азарар (ма-ститы, циститы, кисты) сагъар хъийидай къуватлу антибиотик я.

*Гъуьлцин тарцин, аморфдин, ли-мондин, ч1уру п1инидин чкалар нервияр секинардай ва хъсан ах-вар гъидай дарман я. Лимондин, ч1уру п1инидин, чумалрин, мерей-рин, малинадин тарарин чкалар ругур гъалимади иви хъсандиз къери ийида.

*Ичин тарарин таза хилерин чкал-ри, жик1ийрин ва инийрин тарарин дувулри, гъак1ни пырейдин ва сви-нороядин дувулри дурк1унар, туь-къуьл ва цварадин куркур къума-дикай ва куьлуь къванерикай ми-хъи хъийида.

АЯЛАР ПАТАЛ

ЗУН даяедин аялрикай я. Миллионралди зи таяр-туьшерин аялвал туькуьл, атлугъай, магьрумвилерин азиятар гъайи даяедин йисарал ацалтна. А йикъар рикел хтай гъар сеферда заз чи хизандин виридалайни багъа ядигарар: ранг фена хъипи хъанвай шикилар, гъайкал хъиз квалнавай пуд пиплен чарар, сур хъанвай газетар гъилелай авун адет хъанва. Абурун арада чи дахдиз даяе башламишдалди орден аваз гайи яру кватины ава. И кватида гила мад са орден ва гзаф кьадар медаларни ава. Абурукай сад «Зегъметдин ветеран» медаль зид я. Яргъал йисара хъсандиз зегъмет члугунай ганвай медаль я ам заз. Сифте сеферда чи дах армиядай хтайла адан хурудал алай пуд медаль акурла зи кефи члур хъанай. Гъатта дакланни хъанай заз. Жечни! А йисара кьериз-цларуз чи гъиле гъатзавай газетрай хуру члулунал кьван орденрини медалри клевнавай инсанрин шикилар аквазвай, дахдин хурудал алайди анжах пуд тир. Гзаф йисар алаатайла, жув пенсиядиз экъечдайла гъавурда акъунай зун-ви хурудал орден ва я медаль жеда ни-жедачни валай ваъ, са нелай ятлани масадалай аслу тирди...

Гатун ракъинин инсафсузвилелди кунизни килиг тавуна, колхоздин келемдин сала квалах кьизгъин я. Лацу-цлару читинин перемар алай дишегълийри къаст авуна келемриз керки язава. Квалах кьизгъин ятлани, инсанрик шадвал, гъевес квач. Арабир инлай- анлай сефил манидин зайиф сес акъатзава, амма тереф хуьдай кас тахъайла гъамни бамиш хъижезва.

Квалахзава дишегълийри кисна. Анжах керкийри ванзава: тап- тап-тап. Анжах рикл кьекъевезва яръгара-вилиз такур, даяедин ялаври кьунвай таниш тушир рекъера. Итимар квалай экъечина даяедиз фейидалай инихъ гзаф варцар

алатнава, амма чпикай са вансесни авачирбур гзаф я. Ара-ара агакъзавай хабарарни вири хуьруьв яс кьаз тазвайбур я. Гъавилляй иниз патай са кас атун, иллаки даяедай хуьруьнви хтун лап члехи вакъиадиз элкъевезва.

Квалахзава дишегълийри кисна. Анжах керкийри ванзава: тап- тап-тап. Йигин я квалахдин ериш. Тап-тап-тап... Бейхабар салан кьерехдилай акъатай кьати сесини вири кьатина: «Мирзе даяедай хтана. Мирзе малим хтана...»

ДАХДИ ГАФ ХВЕНА



Са легъзеда сал ичли хъана. За кьуд пата вил экъуьрзава. Сала амайди келемдихъ кьвач галклана ярх хъанвай са зун я.

Зун чи члехи кваллин ракларал акъваз хъана. Цларивай циргъ яна дишегълийар, кваллин вини кьиле цлав игисна эцигнавай столдихъ кьве итим ацукънава. Абурукай сад чи члехи ими, муькуьди-даяедин парталар алай кас, заз чин тийидай са халу я. Бес дах гъинава?

-Гъикл хъана, хва, ваз дах чир жезмачни?- хабар кьазва завай хуьруьн кваз даяедин парталар алай халуди. Гила чир жезва заз ам дах тирди. Зверна фена гардан кьазва. Ада зун жажна метел ацуькарзава.

Гъа и арада тир заз хурудал алай медалар тлимил яз акурди, гъа и арада тир дах даяедай сагъ-саламатдиз хтунин шадвилхъ галаз санал медалрин тлимилвили кьагъурни гъайиди.

Гъар гъикл ятлани, дах даяе-

дин цлаярай сагъ-саламатдиз хтанвай. Им а вахтунда дуьньядал виридалайни члехи бахт яз гъисабзавай.

Са кьве базардин йикъара дахди кваллин къайгъуяр авуна. Жугъунар дуьзар хъувуна. Сала къайда туна. Са кьве фургъунда авай цлам-кларас гъана.

Август эхирдиз кьевезвай. Мукъвара тарсарни башламишун герек тир. Гила дахдин йикъан члехи пай школада акъатзавай. Бахди колхоздин квалахдилай хтайла няхихъ лампадин экуьнал чи пекпартал рапунилай ийизвай, школадиз чи гъазурвал аквазвай. Ихътин йикъара заз акл тир хъи вири дуьнья секин я, даяе куьтягъ хъанва.

Амма са экуьнахъ вири цлийи кьилелай башламиш хъхъана. Ахварай аватай заз дах мад гъа аскердин партал алаз акуна. Квалени мукъвакьилияр, кьуни-кьуншияр кватл хъанвай. Бахди сив рахан тийиз дахдин шейэр, фу- кьафун ранг фенвай са турбада твазвай. Адан чин акъван члурузвай хъи, садавайни ам диндирмишиз жезвачир.

Захъни суалар гзаф авай. Амма зи туьтуьна са вуч ятлани акланвай хъиз тир заз. Ада заз рахадай мумкинвални гузвачир. Амма вуч ятлани са нагъакъан кар хъанвайди кьатлизва за. Эхирни дахдиз зун авай гъал акуна. Ада зун кьужахламишна ва секинвал кутадай инанмиш сесиналди лагъана:


-Душманди чи дагъларихъ ялзава, хва. Ам акъвазарун патал зи куьмекни герек хъанва. Гъавилляй зазни армиядиз эвер хъувунва. Хъсан гада хуьхъ. Бахдиз яб це. Душман кукварна дах куь патав геж тавуна хкведа.

Дахди, гъамиша хъиз, и сефердани гаф хвенай. Душман Кавказдай чукурайла ам яшлу я лагъана мад кваллиз рахкурнай.

Фикрет ГЪАЖИЕВ,

Лезги писателрин Союздин член, зегъметдин ветеран.

КРОССВОРД



ДУЪЗ ЦІАРАРА: Ягълудал чранвай як. 3.Пишкеш. 5.Ківач галкун. 7.Менфят. 8.Гуърчег дишегъли. 10.Тіуър затлуникай чандиз хийир хъун. 11.Рекъе тун, фикир санал ківатлун. 13.Гзаф. 15.Чуруяр твадай кас. 17.Гъам дагъда, гъам ... 19.Ачух ва 21.Квахърай, алатрай. 22.Гъилив храй кър, алафа. 23. Дуланажагъ. 25.Эсер тежедай кас. 28.Сагъсуз кас. 29.Терездай акъудун. 30.Теспача хъун, гьерекатун.

ТИК ЦІАРАРА: 1.Къуват, гъайбат, 2.Пара, гзаф. 3.Секинвал, къал акъуд тавун. 4.Чувудрин пак тир таб. 6.Хваран шараг. 8.Мягтел жедай, аламат. 10. Чан-рик авун. 12.Гъар са кардикай пай атлун, кьерех авун. 13.Ціур авун, тлал члугун. 14. Тфенг. 15.Чара. 16.Къамишдикай авур, макъамар ядай алат. 18.Чуків. 20.Вине ваъ.... 22.Рагъметдиз фенвайдаз гудай игъсан. 24.Сесинин са жуьре. 25.Лежберрин календардай гатфарин са шумуд югъ. 26.Дагъдин мандав. 27.Эменнидивай фекъидиз гудай гъакъи.

Кроссворд туьклуьрайди-
Абдузагъир АТАХАНОВ я.

КАМАЛДИН ХАЗИНАДАЙ

1. Ички ширин хъайидан эхир туькьуьл жеда. Ичкидал рикі алайди фад пуч жеда. Ичкидиз салам гайида акъулдиз сагърай лагъана кланда.

2. Йисари агажарайди санани дуьз хъижедач. Йисари тухвайди садавайни вахкуз жедач.

3. Кавча гъиле гъатайдан куруниз куьк тикейр къведа. Тіуьнивай акъвазайди ківачел

акъваз хъийидач. Тіуьрдалай незмайди тлімил акун нефсинин аламат я. Кайи мециз дад чир жедач. Кайиди хъукъвайдал гьалтна.

4. Кичі акатайдаз мукъва-къилини ахквадач. Кичіле хъайидакай къиздирма хкатда. Кичіледа хуьзвай нехирни хкундайди жеда. Кичіледаз вичин сериндихъайни кичіле жеда.

Къилин редактор
Р. АБДУРАГЪИМОВ.

Редакциядин адрес:
368780. РД, Магъарамдхуьруьн район, Магъарамдхуьр, Ленинан куьче, 4.

Газет гъафтеда садра
акъатзава.

Учредитель: Администрация муниципального района «Магарамкентский район».

Адрес: 368780. РД, Магъарамдхуьруьн район, Магъарамдхуьр, Гагаринан куьче, 2.

Газета «Самурдин сес» (Голос Самура)
зарегистрирована Региональным
управлением Комитета РФ по печати в РД.

Чап ийиз вахкудай вахт - 16.00.

Чапун патал къул члугуна- 15.00.

Газетдин регистрацйадин нумра- Д 0174

Газет ООО «Самур» типографияда гъазурна
ва гъана чапна. Типографиядин ва
издателдин адрес: 368780. РД,
Магъарамдхуьруьн район, Магъарамдхуьр,
Ленинан куьче, 4. Лезги чап.

Индекс 63340. Тираж 1400
Заказ № 36.

Телефонар: редактор- 25-1-37, жавабдар секретарь - 25-1-39,
бухгалтер-25-9-69.

6+